



Fidoyilik —
Vatanga xizmat demak!

2024-yil 17-fevral, shanba,
20 (23.897)-son

**KUN
HIKMATI**

Inson hech
qachon bitta
fazilati bilan
obro'
topmaydi

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz

Samarqand viloyati hokimining QARORI

Xalq deputatlari viloyat Kengashining oltinchi chaqiriq to'qson oltinchi sessiyasini chaqirish to'g'risida

"Mahalliy davlat hokimiyati to'g'risida"gi O'zbekiston Respublikasi Qonunining 17-moddasiga asosan QAROR QILAMAN:

1. Xalq deputatlari viloyat Kengashining oltinchi chaqiriq to'qson oltinchi sessiyasi **2024-yil 23-fevral kuni** chaqirilsin.

2. Sessiya kun tartibiga quyidagi masalalar kiritilsin:

- viloyat hokimining o'rinbosari - investitsiyalar va tashqi savdo boshqarmasi boshlig'i O.Hamroyevning 2024-yilda eksport va investitsiyalarni jalb etish bo'yicha amalga oshiriladigan ishlar to'g'risida hisoboti;
- O'zbekiston Respublikasi Prezidentining viloyatdagi Xalq qabulxonasi mudiri M.Turdiyevning viloyatda aholi murojaatlari va muammolari bilan ishlash holati yuzasidan axboroti;
- O'zbekiston Respublikasi Prezidentining 2020-yil 24-noyabrdagi "Sud hujjatlari va boshqa organlar hujjatlarini ijro etish tizimini yanada takomillashtirish chora-tadbirlari to'g'risida"gi PF-6118-son farmoni ijrosi yuzasidan Majburiy ijro byurosi viloyat boshqarmasi boshlig'i S.Jabborovning hisoboti;
- viloyatda 2025-yilda davlat tibbiy sug'urta tizimini joriy qilish bo'yicha chora-tadbirlar rejasini tasdiqlash uchun viloyat sog'liqni saqlash boshqarmasi boshlig'i S.Zayniyevning hisoboti;
- viloyat iqtisodiyot va moliya boshqarmasi boshlig'i B.Mirzayevning viloyat hokimining 2024-yil 10-fevraldagi "Viloyat mahalliy budjetining qo'shimcha manbalaridan foydalanish to'g'risida"gi 36-7-0-Q/24-son qarori bilan ajratilgan mablag'larining ishlatilishi yuzasidan hisoboti;
- Jomboy tumanidagi ayrim aholi punktlarini nomlash to'g'risida;
- viloyatda 2024-yilda yangi ish o'rinlarini tashkil etish va aholi bandligini ta'minlash dasturini tasdiqlash to'g'risida;
- hududlardagi issiqlik bilan ta'minlovchi korxonalar tomonidan ko'rsatiladigan issiqlik ta'minoti xizmatlari uchun tartibga solinadigan tariflarni tasdiqlash to'g'risida;
- jamoat ehtiyojlari uchun yer uchastkalarining olib qo'yilishiga ruxsat berish to'g'risida;
- xalq deputatlari mahalliy Kengash deputatlari tomonidan o'z saylovchilari oldida axborot berishning namunaviy tartibini tasdiqlash to'g'risida;
- viloyat hokimining ayrim qarorlarini tasdiqlash to'g'risida.

Viloyat hokimi

E.TURDIMOV

2024-yil 16-fevral

Viloyat hokimining sayyor qabulini kuza-tar ekanman, beixtiyor O'zbekiston xalq artisti Ergash Karimovning "Sovchi" obrazidagi shu gaplari yodimga tushdi. Sababi, qabulda hokimdan so'ralmagan narsaning o'zi qolmadi, insofdan bo'lak hamma narsa so'raldi. Hatto tug'ilgan farzand uchun beshik ham.

Murojaatlardan biri:

- Hamshira bo'lib ishga kirmoqchi edim, pul talab qilishyapti, - salom-aliqdan so'ng birdan maqsadga ko'chdi fuqaro.
- Shikoyat yozing, ko'rib chiqishadi. Lekin buyruq berib hamshiralikka joylashtira olmayman, - dedi E.Turdimov.
- Sobiq erimdan uch yildan beri aliment pullarini undira olmayman, - keyingi masalaga o'tdi murojaatchi.
- Majburiy ijro byurosi mas'ullariga holatni o'rganib, aliment pullarini undirish topshirig'i berildi.



- Kreditimni yopishda yordam bering. Dadam insult bo'lgan, unga qarashish kerak...
- Agar to'xtamasangiz, men ham insult bo'laman, - dedi hokim. - Insof bormi, baraka topgir?
- Yana bir fuqaro qabulga nogironlar aravachasidagi otasini yetaklab kelgan. Otaxon ham kichigidan boshlab, keyin maqsadini aytdi. Oz emas, ko'p emas, hokimdan o'g'li uchun bittagina "Cobalt" olishda yordam berishni so'radi. "Meni olib yuradi o'sha mashinada", deydi u. Beixtiyor ko'zim uning ortida turgan "bechora" o'g'ilga



INDALLOSINI AYTGANDA...

Qiyom NAZAROV,
falsafa fanlari doktori:

- Zamonaviy tadbirkorlarga xos ma'naviy yetuklik shartlaridan biri insoniy sifatlarining uyg'unligidir. Kishining ichki va tashqi dunyosi, sog'lom fikri, oqilona so'zi bilan amaliy faoliyati, tili bilan dili birday bo'lishi yetuklik mezonini hisoblanadi.



"AKASIGA TOR SHIM, SINGLISIGA KALTA YUBKA, O'LGAN BUVISIGA YANGI KAFANLIK.."

tushdi. To'rt muchasi sog', gavdasidan ot hurkadi. Shu odam uyalmay nogiron otasini "bayroq" qilib kelibdi. Mashinali bo'lib qolaman, deb o'ylagan-dir-da.

Bu murojaatni "hazm qilib" ulgurmasidan yangisi jarangladi:

- Homiladorman, yashash sharoitim og'irroq, tug'ilajak bolamga kolyaska va karavot olib bersangiz...
- Hokim so'raydi: "Senga qarashdigan er yo'qmi?"
- Erim bor. Hokimiyat ham yordam berishi kerak-ku.

Qabulda noqonuniy qurilishini qonuniylashtirish, kreditni to'lab berish, sud qarorini bekor qilishni so'raganlar ham bo'ldi. Uyim yo'q, subsidiyaga uy bering, deganlarning rad javob olib, "Lasetti"da ketganini ko'rdim.

Har sayyor qabulda ko'rinish beradigan "doiniy" murojaatchilar mas'ullarga "Meni tani-dingizmi", deb kinoya qilishdan-da uyalmadi. Ammo bu safar ularning rejasini amalga osh-

madi. Hokim boqimandalarga qisqa va lo'nda qilib, "Biz sizga yordam berolmaymiz", deya javob qaytardi.

Bu bilan tadbirida asosli murojaatlar bo'lmadi, demoqchi emasmiz. Masalan, Nurobodning Tim qishlog'idan kelgan fuqaro mahallasining 5 kilometr ichki ko'chasini asfalt qilib berishni so'radi. Hokim mas'ullarga mazkur murojaatni ijobiy hal qilish topshirig'ini berdi. Yana bir fuqaro xususiy bog'cha ochgani, ammo ishni boshlashiga ayrim byurokratik to'siqlar g'ov bo'layotganini bildirdi. Mazkur muammo huquq-tartibot idoralari tomondan o'rganib chiqilib, qisqa muddatda yechilishi aytiladi.

Qabulda hokimdan bola asrab olishda huquqiy yordam berishni so'ragan ham bo'ldi. Buni qaranga, kimdir tirnoqqa zor, boshqalar esa hali tug'ilgan farzandini o'rtaga qo'yib, davlatdan nimadir umidvor.

Xullas, qabulda murojaatlar ham insonlarimiz singari xilma-xil bo'ldi.

Asqar BAROTOV.

Talabalar sarson bo'lmaydi

"Ipak yo'li" turizm va madaniy meros xalqaro universitetining 400 o'rinni yotoqxonasi foydalanishga topshirildi

Davlat-xususiy sheriklik asosida qurilgan bino Samarqand turizm va madaniy meros texnikumi hududida joylashgan.

- Talabalar turarjoyi "Z-P-A" oilaviy korxonasi tomonidan davlat-xususiy sherikligi asosida barpo etildi, - deydi

universitet reja-moliya bo'limi yetakchi mutaxassisi Alisher Shamsiddinov. - Loyiha qiymati 25,4 milliard so'm bo'lib, shundan 12 milliard so'mi davlat subsidiyasi, qolgan mablag' esa xususiy sherik hisssasi hisoblanadi. Besh qavatda ham oshxona, kir yuvish xonalari mavjud. Binoga tutash hududda mini futbol stadioni, basketbol maydoni qurilgan.

- Universitetning gid hamrohligi va tarjimonlik faoliyati yo'nalishida o'qiyman, - deydi jizzaxlik Surayyo Mamirova. - Yotoqxonaga yo'qligi uchun 400 ming so'mdan pul to'lab, 10 kishigacha bitta xonada ijarada turardik. Yotoqxonaga qurilgach, bu muammolardan qutildik. Xonalar shinam, issiq, dars qilish, sport bilan shug'ullanish, dam olish uchun zarur sharoit yaratilgan.

Yotoqxonaga binosi ochilish tadbirida universitet rektori - Ekologiya, atrof-muhitni muhofaza qilish va iqlim o'zgarishi vaziri, Aziz Abduhakimov ishtirok etdi.

Vazirlar Mahkamasining 2021-yil 9-sentabrdagi "Respublika oliy ta'lim muassasalarida talabalarni turarjoy bilan qamrab olish darajasini oshirish chora-tadbirlari to'g'risida"gi qaroriga ko'ra, 2022-yildan 2025-yilga qadar Samarqand viloyatida 10 ming o'rinni 25 ta talabalar turar joyi qurish rejalashtirilgan.



COP14 yashil jamoat parki yaratildi



Samarqandda davom etayotgan BM Tning yovvoyi hayvonlarning ko'chib yuruvchi turlarini saqlash bo'yicha Konvensiyasi ish-tirokchilari konferensiyasining 14-yig'ilishi (CMS COP14) qatnashchilari bugun yangidan barpo etilayotgan "COP14 yashil jamoat parki"da daraxt ko'chatlari o'tqazdilar.

Jamoat parki uchun Samarqand tumanidagi Yangijoy mahallasi hududidan 4,5 gektar yer maydoni ajratilgan. Bu yerda 2,5 ming tupdan ortiq daraxt ko'chatlari o'tqazilishi bilan birga shaxmat burchagi, choy paviloni, veloyo'lak tashkil etilmoqda.

- Jamoat parkida landshaft dizayni asosida "SOR" so'zi aks ettiriladi va bu ushbu bog'ning qachon, nima maqsadda tashkil etilgani ramzi bo'ladi, - deydi O'zbekiston Ekologiya, atrof-muhitni muhofaza qilish va iqlim o'zgarishi vaziri Aziz Abduhakimov. - Biz bu yerda yovvoyi hayvonlarning ko'chib yuruvchi turlarini saqlash bo'yicha konvensiyaga va Samarqandda o'tkazilgan yig'ilishga doir ma'lumotlarni joylashtiramiz. Maxsus burchaklar tashkil etiladi va bu park CMS COP14 davrida tashkil etilgan bog'

sifatida tarixda qoladi. Parkda turli xil daraxt ko'chatlari, jumladan, shumtol, zarang, yapon saforasi, qrim qarag'ayi ekilishi rejalashtirilgan.

Oilaviy ajrimlar o'syapti

Bu muammoda kim aybdorligini emas, yechimini topish muhim

Statistik ma'lumotlarga ko'ra, 2020-yilda 28,2 ming, 2021-yilda 39,3 ming, 2022-yilda 48,7 ming oila o'z muammolarini ajrashish orqali "hal qilgan". 2023-yilning 10 oyi davomida esa 41583 ta ajrim qayd etilgan.

Bir qarashda oddiy raqamlar, ammo yil sayin o'sib borayotgan bu ko'rsatkichlar ortidan qotillik, o'z joniga qasd qilish holatlari yuz beryapti? Bu masala hozircha keng miqyosda o'rganilmayapti, mabodo o'rganilayotgan bo'lsa ham ma'lumotlar ochiqdanmayapti.

AKAM YONIMNI OLMAGAN

Safarlarimizning birida bir juvon gap aylanib oila masaliga kelganda hayotida yuz bergan bir voqeani so'zlab berdi:

- Erka yoki tantiq bo'lmanman, ammo odatiy kunlarning birida erimning ukasi bilan gapimiz chiqishmay qoldi. Holatga qaynonam aralashdi. Tabiiyki, u kishi o'g'lining yonini oldi. Bu munosabat qattiq alam qilganidan, xayr-xushni nasiya qilib, ota uyimga jo'nadim.

O'sha vaqtlarda akam rosa ko'chga to'lgan, ustiga-ustak tijorati avj pallasi edi. Shu sababmi, ular meni qattiq himoya qilishiga, qaynukam bilan "gaplashib" qo'yishiga ishonardim.

Vaziyat men kutganchalik bo'lmasa-da, keyinchalik o'yab ko'rsam, akam o'shanda to'g'ri ish qilgan ekan...

U kishi kechqurun ishdan qaytganlarida meni ko'rib hayron bo'lmadi, odatdagidek so'rashib, dasturxon boshida uyoq-buyoqdan gaplashgan bo'ldi. Bomdoddan keyin "qani, mashinaga chiq", deb qoldilar. Sokin aytilgan bu gapdan keyin "endi ko'rishadi", degan o'y o'tdi, xayolimdand.

Gap shu yerga yetganda juvon "yaqinlaringizning oilasidagi "qo'ydi-chiqdi"ga hech aralashganmisiz, deb so'rab qoldi. Men esa bunday bo'lganini eslolmadim. Boshqa gap qo'shmasdan hikoyani davom ettirdi.

- Qop-qora "Mercedes" (o'sha vaqtlarda bunaqa avtoulovga qariyb hamma havas qilardi) darvozamiz yonida to'xtadi. Akam "sen kiraver, men hozir" dedi. G'o'ddayib darvoza hatlashim bilan akamning mashinasi sassiz iziga qaytdi...

KIMLAR ARALASHGANI MA'QUL?

Hikoya shu yerga yetganda kamina ham bu yigit singlisining ustidan sovuq suv qo'ygandek mulzam qilib qoldirib, yaxshi qilmagan ekan, deb o'yiladi. Ammo uning aytishicha, bu voqea unga katta saboq bo'lgan - boshqa biron mara o'z oilasidagi muammo yo masala sabab ota uyiga bormagan. Faqat yaqinlarining diydori uchungina ostona hatlagan...

Oila va xotin-qizlar qo'mitasiga ko'ra, nikohdan ajralish sabablari o'rganilib, tahlil etilganda uchinchi shaxs aralashuvi 15 foiz, farzandsizlik 12,3 foiz, uzoq vaqt bir oila bo'lib yashamaganlik 12,2 foiz, moliyaviy va moddiy qiyinchiliklar 5,9 foiz, xiyonat 2,7 foiz, spirtili ichimlik va giyohvand moddalar iste'moli 2,6 foiz, ommaviy yoki xorijiy madaniyatning salbiy ta'siri 2,1 foiz, tazyiq va zo'rvonlik 1,5 foiz va boshqa sabablar 26,9 foizni tashkil etgan.

Oilalarda 1,9 foiz holatda chet elga chiqish maqsadida va 5 foiz holatda imtiyozli uy olish maqsadida ham ajrimlar amalga oshirilgan.

Ko'rinadiki, ajrimlarning katta qismi er yoki xotindagi muammo sababli yoki ularning shaxsiy qarori bilan emas, boshqalarning aralashuvi oqibatida yuz bergan. Shuning o'zi qosh qo'yaman, deb ko'z chiqarayotganimizga, oila ishiga ko'p aralashayotganimizga isbot emasmi?

- Qaynona yoki qaynota o'g'lining ayoliga hukmbar-dorlik qilishga haqi yo'q, - deydi tanish yuristlardan biri. - Lekin bu qaysidir xonadonga borgan qiz yoki juvonga oila kattalarining gapini ikki qilishiga asos bo'lmaydi. Qadriyatlarimizga ko'ra, turmush o'rtog'ining muhtaram kishilarini e'zozlashi shart.

Afsuski, aksar oilaviy mojarolar na qonunga, na shariatga va na qadriyatga to'g'ri kelmaydigan ishlar sabab paydo bo'ladi.

BU HAM BO'LGAN VOQEA

- Jijyanlarimning kattasi badavlat xonadonga kuyov bo'ldi, - deydi suhbatdoshlarimdan biri. - Dang'illama to'y bo'ldi, borish-kelishlar quyuqlashgandan quyuqlashdi.

Oradan ko'p o'tmay, quda tomon kelining ko'ch-ko'ronini yig'ishtirib ketganini eshitdim.

Hech qancha o'tmasdan shunday voqea o'zimizda sodir bo'ldi. Jijyanim "tanishlaringiz bor, ajrashaman, yordam qilasiz," deb qoldi. Indamadim, unisi-bunisiga uchrashib, kerakli hujjatlarni to'pladik va sudga taqdim qildik.

Bilishimcha, aslida muammo bir parcha matodan kelib chiqqan. Qaysidir marakada keliningning onasiga berilgan hadya ma'qul kelmagan - arzon matoh, boyvuchcha qu-daning ko'nglini og'ritgan. Shu sabab kuyovning onasini o'zi tomondagi bir yig'inga aytmagan. Bu ginalardan keyin ikki xotin navbatma-navbat bir-biridan "o'ch" olavergan. Tabiiyki, gohida jijyanim, gohida kelin jabrlangan. Kelin tomon "qo'li kalta" kelgan vaqt uni ota uyga qaytargan.

Mulohaza

Aytganim shu bo'ldi: "Kelin, yaxshi ish qilmayapsizlar, tez kunlarda ajrim ham bo'lar. Keyin ota-onang o'z oilasi, buniqilar o'zini bilan andarmon bo'lib, bu dixirialikni unotib ham yuborishadi. O'rtada ikkovingning oilang buzilgani qoladi. Masalani er-xotin o'zaro gaplashib olsaring yaxshiydi".

Ko'p o'tmay ikki yosh o'zaro kelishib, ijara uyga chiqib ketishdi. Bugun 2 o'g'li, 3 qizi bor. Ajrashib ketishlariga bir bahya qolganini eslashmaydi ham...

OILA MUQADDAS QO'RG'ON

Bu ibora tilimizda aytilishi oson, ammo mulohaza qilib ko'rsilsa, uning mohiyati, asl mazmunini aksar hollarda unotib qo'yayotgandekmiz. Chunki oila qurish arafasidagi yoki oila qurganlar bilan ham gaplashib ko'rsangiz nikohning shartlari haqida tayinli bir so'z aytilmasligi bor gap.

Mahr, guvoh, iyjob va qabul haqida eshitishmagan ham. Mayli, bu masalalar yoshi ulug'lar tomonidan hal qilina-di-ku, deyishingiz mumkin.

Shu sabab e'tiboringizni boshqa bir raqamlarga qaratmoqchiman. Statistik ma'lumotlarga ko'ra, 2020-yilda 16564 nafar, 2021-yilda 19037 nafar, 2022-yilda 18955 nafar chaqaloqqa yolg'iz ona arizasiga asosan tug'ilganlik haqida guvohnoma berilgan.

Demak, ular otasiz dunyoga kelganmi? Otasi bo'lsa, qani ular? Agar oila muqaddasligini farzand oldida mas'uliyati, majburiyati borligini bilishganida, o'g'li yoki qizini tan olmasmidi?

Bundaylar bugunku javobgarlikdan qochayotgan ekan, keyinchalik o'zidan qanday qochadi? Buni ularga kim o'rgatadi?

Axir rasmiy tuzilmagan nikoh jilla qursa, shar'iy bo'lgandir? "Javobgar"ga chora ko'rilmasa ham burchini, vazifasini bo'yuniga qo'yib berish kerak emasmi?

Umuman, nikohdan murod zinning oldini olish, Yaratganning amrini bajarish, sunnat amal ekanligini bilamizmi? Bilsak, undan keyingi masala - oiladagi, ro'zg'or yuritishdagi axloq, er-xotin munosabatlarini kimdan o'rganamiz?

MASHINANING EGASIGA QULOQ SOLAMIZ, O'ZIMIZNIKIGA-CHI?

Ajrimlarni kamaytirish uchun qancha ishlar qilin-yapti, deya tana-dashnom qilishga shoshilmang. Biroq bu ishlar tahlil qilinsa, uy ichiga qamalib qolgan kapalakning tabiat qo'yiniga intilib, be-to'xtov oynaga urilayotgan holati ko'z o'ngimizda gavdalanadi. Chunki kapalak o'yab, mantiqan harakat qilmaydi, balki qilolmaydi. Oqibatda de-razaning ochiq joyini topmaydi. Biz ham chiqish yo'llarini izlamasdan tinimsiz muammo yechimi borasida harakat qilayotgandaymiz.

Shu topda imom xatiblardan birining aytgan gapini esladim: "Avtomobil yoki biron texnika sotib olsangiz, ishlab chiqaruvchi bergan tavsiyalarga qattiq amal qilasiz. Masalan, avtoulovga bunaqa yoqilg'i mumkinmas, degan bo'lsa, o'shandan hech qachon mashinangizga solmayisiz. Qancha vaqtda moyini almashtirish kerak deyilgan bo'lsa, qat'iy amal qilasiz. To'g'ri, bu tavsiyalarni texnikani ishlab chiqaruvchi bergan, unga amal qilin-masa, buzilishi, tezda ishga yaramay qolishi mumkin.

Lekin odamni Yaratgan zot, aql berilgan jonzotiga nima mumkinu, nima mumkin-masligini aytmaganmi? Nega oila qurishi keragu, unda munosabatlar qanday bo'lishi kerakligini bildirmaganmi?"

NEGA XULOSA QILMAYMIZ?..

Ma'lum bo'lishicha, 2022-yil Samarqand-da 11 ta nikoh yoshi 1 yilga qisqartirilgan fuqarolik holati dalolatnomalari ("ZAGS") qayd etilgan.

Amaldagi tartibga ko'ra, nikohga kirish yoshi uzrli sabablar mavjud bo'lganda, alohida holatlarda (homiladorlik, bola tug'ili-shi, voyaga yetmaganning to'la muomalaga layoqatli deb e'lon qilinishi — emansipatsiya), nikoh tuzishni xohlovchi shaxslarning ittimosiga ko'ra bir yildan ko'p bo'lmagan muddatga kamaytirilishi mumkin.

Shunda nikohsiz yashagan 11 ta oilada farzand tug'ilgani yoki oila qurish yoshiga yetmagan shuncha kelin homilador bo'lgani rasman aniqlanayaptimi? Savol tug'iladi, nikohsiz tug'ilgan farzandning hukmi qanday bo'lishini nikohlanuvchilar, ularning yaqinlari bilishmaganmi?

Umuman, erkak va ayol yoki yigit va qiz o'rtasidagi munosabatlar qanday hollarda halol, qaysi o'rinlarda harom ekanligini nuqta, verguligicha bilishimiz shart emasmi?

Xulosa qilish sizning hukmingizga havola.

Yoqubjon MARQAYEV.



inson manfaatlariga xizmat qilmoqda

Payariqlik G'afur Sanaqulov ustachilik qiladi. 18 yil oldin baxtsiz hodisa sabab nogironlik aravachasiga mixlanib qolgan. Shunday bo'lsa-da, hayot sinovlarini mardonavor yengib, qo'lidagi hunari ortidan ro'zg'or tebratib kelmoqda. Uni qishloqdoshlari G'afur usta, deb atashadi. Chunki buzilgan elektr jihozlarini sozlash, singan asbob-uskunalarni payvandlash kabi yumushlarni tezda bajarib beradi.

- Taqdir shu ekan, ammo nolimayman, Yaratganga shukr, uch qizni tarbiyalab voyaga yetkazdim, - deydi G'afur Sanaqulov.

- Har qanday odam boshqalarga og'iri tushmasligini istaydi. Afsuski, o'tgan davr mobaynida o'zim mustaqil harakat qilolmasligim ortidan oilamdagilarni biroz qiynab qo'ydim. Shukrki, davlatimiz rahbari tomonidan men kabi insonlarni qo'llab-quvvatlash uchun bir muncha yengilliklar berilyapti. "Inson" ijtimoiy xizmatlar markazi tashkil etilishi ana shunday qulayliklardan biri bo'ldi. Yaqinda markaz tomonidan berilgan elektron aravacha bilan uyda ham, mahallada ham bemalol harakatlanayapman. Mahalladagi to'y-ma'rakalarda qatnash-yapman.

Joriy yil avvalida tumanda nogironligi bo'lgan 6 nafar fuqaroga shunday zamonaviy nogironlik aravachasi berildi. Bu ishlar yangi faoliyat boshlagan "Inson" ijtimoiy xizmatlar markazining asosiy yo'nalishlaridan biridir.

Yangi tahrirda qabul qilingan, Bosh qomusimizda qayd etilgan, "ijtimoiy davlat" tamoyilini hayotga tatbiq etish, fuqarolarning ijtimoiy himoyaga oid huquq va manfaatlarini ta'minlash, aholiga ijtimoiy xizmatlar ko'rsatish sifatini tubdan oshirish maqsadida "Inson" ijtimoiy xizmatlar markazlari sharkazlari tashkil etildi. Ayni paytda ushbu yo'nalishdagi ishlar tizimli yo'lga qo'yilib, belgilangan chora-tadbirlar samarali amalga oshirilmoqda. Dastlab, o'tgan 2023-yilning oktabr oyidan eksperiment tariqasida Paxtachi tumani va Kattaqo'rg'on shahrida faoliyat boshlagan "Inson" ijtimoiy xizmatlar markazlari bugun Samarqand viloyatining barcha tumani va shaharlarida tashkil etilmoqda.

Yangi yildan faoliyat boshlagan Payariq tumani "Inson" ijtimoiy xizmatlar markazida aholiga sifatli ijtimoiy xizmatlar ko'rsatish uchun

barcha qulayliklar yaratilgan. Markazda bugungi kunda katta yoshdagilar va og'ir ijtimoiy vaziyatga tushib qolgan oilalar bilan ishlash, nogironligi bo'lgan shaxslar bilan ishlash, mahallalarda ijtimoiy xizmatni tashkil qilish, bolalarni ijtimoiy himoya qilish shu balari faoliyat olib bormoqda. Mahallalardagi yakka-yolg'iz, nogironligi bo'lgan shaxslarga 12 nafar ijtimoiy assistent xizmat ko'rsatadi.

- Markaz tomonidan 38 turdagi ijtimoiy xizmatlar ko'rsatilishi belgilangan, - deydi markazning nogironligi bo'lgan shaxslar bilan ishlash shu'basini mudiri Rahmatulla Yunusov. - Bugungi kunda 14 xizmat turi to'liq yo'lga qo'yilgan. Xususan, nogironligi bo'lgan shaxslar bilan ishlash yo'nalishida nogironlikning oldini olish va nogironlikka olib keluvchi omillarni erta aniqlash maqsadida tuman tibbiyot birlashmasining malakali mutaxassislari, tibbiy-ijtimoiy ekspertiza komissiyasi ma'sul xodimlari bilan hamkorlikda mahallalarda sayyor qabul va tibbiy ko'riklar o'tkazib kelinmoqda. Bunda nogironlikka olib keluvchi kasalliklar profilaktikasiga, nogironligi bo'lgan shaxslarning salomatligini mustahkamlash maqsadida reabilitatsiya qilishga alohida e'tibor qaratyapmiz. Albatta, tibbiy-ijtimoiy ekspertiza komissiyasining xulosasi bilan nogironligi bo'lgan shaxslarga zurrur protez ortopediya mahsulotlari va reabilitatsiya texnik vositalari belgilangan navbat asosida yetkazib berilmoqda. Joriy yil boshidan tumanimizdagi nogironligi bo'lgan shaxslarning 6 nafariga elektron aravachalar berildi. Bu kabi ishlar belgilangan reja asosida davom etadi.

"Inson" ijtimoiy xizmatlar markazlarining tashkil etilishi aholi duch keladigan pensiya tayinlash, ijtimoiy nafaqalarni belgilash, nogironligi bo'lgan shaxslarning ijtimoiy ta'minoti, yakka-yolg'iz keksalarni parvarishlash kabi masalalarga yechim bo'ldi. Payariq tumani misolida bu boradagi ishlarning dastlabki natijalariga guvoh bo'ldik. Albatta, tizim to'liq ishga tushib, belgilangan xizmatlar ko'rsatilishi to'laqonli yo'lga qo'yilsa, ko'zlangan maqsadga erishiladi.

G' HASANOV,
A.ISROILOV (surat).

Viloyatning ijtimoiy-iqtisodiy holati raqamlarda

Dastlabki ma'lumotlarga ko'ra, 2024-yilning 1-yanvar holatiga kelib viloyatimizdagi doimiy aholi soni 4208509 kishi (2119590 nafari erkaklar, 2088919 nafari ayollar)ni tashkil etmoqda. Doimiy aholining 1542879 nafari shaharda, 2665630 nafari esa qishloqlarda istiqomat qilmoqda.

Faoliyat ko'rsatayotgan korxonalar va tashkilotlarning soni (fermer va dehqon xo'jaliklaridan tashqari) 43477 ta (ulardan kichik korxonalar va mikrofirmalar 37398 ta)ni tashkil etdi.

2023-yil yanvar-dekabr oylarida yangi tashkil etilgan korxonalar va tashkilotlar soni 7771 ta bo'lib, 2018-yilning mos davri bilan solishtirilganda 2940 taga ko'paygan.

2023-yilda sanoat sohasida 32 trillion 676,8 milliard so'mlik mahsulot ishlab chiqarilib, 2022-yilga nisbatan o'sish 105,8 foizni tashkil etdi. Sanoat mahsulotlari aholi jon boshiga 7848,6 ming so'mdan o'g'ri kelmoqda. Xalq iste'moli mollari ishlab chiqarilishi 10 trillion 415,7 milliard so'mni tashkil qilib, 2022-yilga nisbatan 1,4 foizga ko'paygan.

Viloyatimizning qishloq xo'jalik mahsulotlari ishlab chiqarish hajmi 2023-yilda 51 trillion 216,4 milliard so'mni tashkil etib, 2022-yilga nisbatan 4,4 foizga o'sdi.

Asosiy kapitalga kiritilgan investitsiyalar hajmi 2023-yilda 26 trillion 584,6 milliard so'mni, o'sish sur'ati 132,1 foizni, pudrat ishlari hajmi 10 trillion 69,1 milliard so'mni hamda o'sish sur'ati 108,9 foizni tashkil etgan.

Jami xizmatlar hajmi viloyat bo'yicha 28 trillion 992 milliard so'm bo'lib, 2022-yilga nisbatan 113,7 foizni tashkil etmoqda. Aholi jon boshiga ko'rsatilgan xizmatlar hajmi esa 6963,5 ming so'mga to'g'ri keldi.

Viloyatning tashqi savdo aylanmasi 2865538,1 ming AQSh dollarini tashkil etib, 2022-yil bilan solishtirilganda 21,1 foizga oshgan. Shuningdek, eksport hajmi 746232,3 ming AQSh dollarini, o'sish sur'ati 117,2 foizni hamda import hajmi 2119305,7 ming AQSh dollarini, o'sish sur'ati 122,6 foizni tashkil etmoqda.

Viloyat statistika boshqarmasi axborot xizmati.

Viloyatimizdagi Zarafshon milliy tabiat bog'i 1975-yilda Zarafshon qo'riqxonasi nomi bilan tashkil etilgan. Vazirlar Mahkamasining 2018-yil 7-fevraldagi qarori bilan Zarafshon qo'riqxonasi milliy tabiat bog'i sifatida nomlandi.

Bog' Zarafshon daryosining o'ng qirg'og'ida 47 kilometr masofaga cho'zilib, daryo oqimi bo'yab Ravotxo'ja to'g'oni va Samarqand shahrining Cho'ponota tepaligigacha bo'lgan hududni egallagan. Milliy tabiat bog'ining jami yer maydoni 2426,2 gektar bo'lib, shundan 680 gektari o'rmon bilan qoplangan. Bog' Jomboy, Bulung'ur tumanlari hududidagi Xashdala, Beshkapa, Do'rmon, So'xmon, O'roqli, Yerteshar, Qizil yulduz, Karapchi, Ashirto'p, Mo'g'ol, Beshkal va boshqa qishloqlar bilan chegaradosh.

Zarafshon daryosining boshlanishi Zarafshon tog' muzliklaridan 2700-2800 metr balandlikdan boshlanadi. Machchox nomi bilan boshlanib, Tojikistonning Ayniy shahridan 3-4 kilometr o'tgandan keyin Panjob daryosi bilan qo'shilib, sharqdan g'arbga qarab oqadi va Zarafshon nomini oladi.

Zarafshon milliy tabiat bog'i O'zbekistonning eng muhim arnitologik hududlari ro'yxatiga kiritilgan. Bog'da 300 dan or-

Milliy tabiat bog'ida avlodlarning haqi bor

tiq o'simlik turi aniqlangan. Baliqlarning 18, amfibiya va sudralib yuruvchilarning 12, qushlarning 218, sut emizuvchilarning 26 turi yashaydi. Shundan bir qismi O'zbekiston Respublikasi qizil kitobiga kiritilgan. To'qayzor va daraxtlarning qisqarishi shu yerda yashayotgan noyob hayvonlar sonining qisqarishiga olib kelmoqda. Milliy bog' hududida qizil kitobga kiritilgan Zarafshon qirg'ovulining eng ko'p papulyatsiyasi yashaydi. Markaziy Osiyo qunduzining bir qancha turlari, Buxoro bug'ularini qayta tiklash bo'yicha ko'p yillik ishlar olib borilmoqda.

Milliy bog'ga 1990-yili dastlab Buxoro viloyatidan 10 bosh Buxoro xonguli bug'usi keltirilgan. Hozirda 6 gektar yopiq maydonda 23 bosh va ochiq tabiatda 100 boshdan ortiq Buxoro xonguli bug'ulari mahalliy sharoitga moslashib, ko'payib bormoqda.

O'zbekistonning eng noyob landshaftlaridan biri to'qay yoki kayir o'rmonlari hisoblanadi. To'qaylar O'zbekistonning eng yirik daryolari qirg'oqlarida ensiz tasma shaklida joylashib, bebaho biotop-

lar, ya'ni toza havo bilan taminlovchilaridir. Kayir o'rmonlari daryoni ifloslanishdan saqlab, suvning tozaligini taminlaydi hamda tabiatda namlik almashinuvida asosiy rol o'ynaydi. Yaqin vaqtlargacha to'qaylar katta maydonlarni egallab kelgan, lekin daraxt va butalarning kesilishi, chorva hayvonlarining boqilishi va daryo o'zanlarining sun'iy o'zgartirilishi uning maydonini taxminan 10 foizga kamaytirdi. Bunday shafqatsiz xatti-harakatlar hozir ham davom etmoqda.

O'zbekistonda to'qay o'rmonlari eng ko'p aziyat chekkan ekosistemalardan biridir. Bunday noyob va xilma-xil o'simlik va hayvonot dunyosi faqat Markaziy Osiyo, jumladan, O'zbekiston hududiga xos. To'qay o'rmonlari Butunjahon yovvoyi tabiat fondi (WWF) tomonidan jiddiy muhofazaga muhtoj ekologik hududlarining Global 200 ro'yxatiga kiritilgan.

Zarafshon milliy tabiat bog'i 7 bo'limdan iborat va har bir bo'lim o'ziga xos tabiiy muhit, fauna va florasiga ega. Bog'ning hayvonot va o'simlik dunyosi ichimlik suvi, sug'orish suvi bilan ta'minlanishi asosan

daraxt va o't-o'lanlar, Zarafshon daryosining suv sathiga bog'liq. Daryoda suv qancha ko'p bo'lsa, milliy bog' fauna va florasiga ijobiy ta'sir ko'rsatadi. Daryo sathi qancha yaqin bo'lsa, yerosti suvi ko'tarilib, dov-daraxt va o'simlik dunyosi yaxshi rivojlanadi. Keyingi 10 yilda daryo sathi o'rtacha 5-7 metrgacha tushib ketdi. Buning asosiy sabablaridan biri daryodan juda katta miqdorda qum-shag'alning kovlab olinishidir. Milliy bog'da hayvonot va nabotot olamini, to'qayzorlarni saqlab qolish uchun Zarafshon daryosining o'rtasida bog'ning daryo qismiga to'g'on qurish lozim.

Prezidentimizning 2024-yil 17-yanvardagi "Suv havzalarida noruda materiallarni qazib olishni tartibga solish chora-tadbirlari to'g'risida"gi farmoni bilan 1-maydan Zarafshon daryosi o'zalaridagi noruda materiallarni noqonuniy qazib olishga muddatsiz moratoriy joriy qilindi. Moratoriy davrida daryo o'zanlari, sohil bo'yi mintaqalari va suvni muhofaza qilish zonalarida qum-shag'al materiallarini noqonuniy qazib olish natijasida tabiatga yetkazilgan zarar uchun jarimalar 10 baravarga oshirilgan miqdorda undiriladi. Bu esa kelajak avlodga tabiatni bor holicha yetkazishga, asrab-avaylashga xizmat qiladi.

Erkin XOLMANOV,
Zarafshon milliy tabiat bog'i
mutaxassisi.

Matbuot uyida viloyat axborot va ommaviy kommunikatsiyalar boshqarmasi tomonidan "Axborot xizmatlari faoliyatini tashkil etishda amalga oshirilgan ishlar va istiqboldagi rejalar" mavzusida anjuman o'tkazildi.

Jurnalistlar nimadan norozi?

Ta'kidlanganidek, respublikamiz davlat idoralarda axborot xizmati faoliyati yo'lga qo'yilganiga besh yil bo'ldi. Ayni kunda birgina viloyatimizdagi 16 ta shahar va tuman hokimliklarida, shuningdek, 65 ta davlat va xo'jalik boshqaruvi organlarida shunday xizmat mavjud. Ular tomonidan 2023-yilning o'zida 2700 ta matbuot tadbiri o'tkazilib, jamoatchilikka faoliyati bo'yicha axborot berilgan.

Viloyatimiz axborot xizmatlari respublikada ilg'or sanalsa ham soha muammolardan xoli emas, - deydi viloyat axborot va ommaviy kommunikatsiyalar boshqarmasi boshlig'i Mannob Ibodullayev. - Xususan, o'tgan yili idoramiz tomonidan 60 marta o'rganish ishlari olib borildi. Axborot xizmatlari faoliyatida aniqlangan kamchiliklarni bartaraf etishda uslubiy va amaliy yordam ko'rsatildi. Xizmat rahbarlari hamda xodimlarining malakasini oshirish maqsadida o'quv-seminarlar o'tkazib kelinmoqda.

Jurnalistlar ayrim tashkilotlardan axborot olish qiyinlashgani yuzasidan izoh so'radi. Ma'lumotga ko'ra, bugungi kunda viloyatdagi 20 dan ortiq tashkilot va korxonalarda axborot xizmati vazifasi boshqa xodimga yuklatilgan. Ya'ni, ularda axborot xizmati rahbari shtati yo'q. Bu esa mazkur tashkilotlar faoliyatini ochiqchilikni ta'minlashda muammo keltirib chiqarmoqda.

Tadbirida matbuot tadbirlarining samaradorligini oshirish, tahliiliy va tanqidiy materiallarga munosabat berilishini ta'minlash, jurnalist va axborot xizmatlari o'rtasida ma'lumot almashish tezkorligini oshirish masalalari ham muhokama qilinib, takliflar berildi.



SAIDRIZO ALIZODA HAQIDA FILM YARATILADI

Samarqand shahrida viloyat hokimligi, O'zbekiston Jurnalistlar uyushmasi viloyat bo'limi, viloyat axborot va ommaviy kommunikatsiyalar boshqarmasi hamkorligida ma'rifatparvar olim, jurnalist va tarjimon Saidrizo Alizoda tavalludining 137 yilligi munosabati bilan ma'naviy-ma'rifiy tadbir tashkil etildi.

Unda viloyat hokimining o'rinbosari Rustam Qobilov, Ozarbayjonning O'zbekistondagi elchisi o'rinbosari Karim Mahmammadzoda, Oliy Majlis Senati a'zosi Farmon Toshev va jamoatchilik vakillari qatnashdi.

Shahardagi 14-umumiy o'rta ta'lim maktabida tashkil etilgan tadbir ushbu ta'lim maskanida o'rnatilgan Saidrizo Alizoda byusti oldida uning xotirasini yod etishdan boshlandi. So'ngra tadbir ishtirokchilari u qoldirgan boy ilmiy-ma'rifiy meros haqida so'z yuritdilar.

Viloyat hokimining o'rinbosari R.Qobilov jaddilarni yod etish, ular qoldirgan ma'naviy merosni bugungi va kelgusi avlodga yetkazish maqsadida asarlar, hujjatli filmlar yaratilayotganini ta'kidlab, Saidrizo Alizoda haqida film hamda spektakl tayyorlashga kirishilganini bildirdi.

Ma'rifiy tadbirda Alizodaning milliy matbuot rivojiga ham katta hissa qo'shgan, Samarqand gazeta va jurnallar tashkil etishda faol ishtirok etib, "Samarqand" (hozirgi "Zarafshon") gazetasi muharriri bo'lgani, "Shu'lai inqilob" jurnalini tashkil etgani e'tirof etildi. Nabirasi Farhod Alizoda bobosi haqidagi xotiralarni so'zladi. O'quvchilar tomonidan jaddi bobomiz to'g'risida sahnalashtirilgan chiqishi namoyish etildi.



- Saidrizo Alizoda ma'rifatchilik inson sifatida qo'shni mamlakatlarda ham ulug'lanadi, - deydi Karim Mahmammadzoda. - Chunki u kishi o'n to'rt tilni bilgan va savodxonlik maktablari tashkil etib, o'sha zamonda ma'rifat ulashishdek ezgu ishda bosh bo'lgan. Alizoda yaratgan darsliklar uzoq yillar ta'lim tizimida qo'llanilgan.

Tadbir ishtirokchilari Saidrizo Alizoda uy-muzeyida bo'lib, bu yerda ma'rifatchilik hayoti va faoliyatiga oid eksponatlar bilan tashnildilar.

Husan ELTOYEV.

Samarqandda sport spartakiadasi boshlandi

Samarqandda huquqni muhofaza qilish idoralari xodimlari, harbiy xizmatchilar hamda sport federatsiyalari terma jamoalari o'rtasida viloyat spartakiadasiga start berildi.

"Yoshlar va biznesni qo'llab-quvvatlash yili"ga bag'ishlangan musobaqada DXX viloyat boshqarmasi, viloyat prokuraturasi, milliy gvardiya, ichki ishlar, favqulodda vaziyatlar, bojxona, sport boshqarmalari hamda Markaziy harbiy okrug qo'mondonligi jamoalari sportning voleybol, basketbol, futzal, shaxmat, erkin kurash, yengil atletika, stol tenisi, suzish va o'q otish turlari bo'yicha kuch sinashmoqda.

Bellashuvlar oldidan tashkil etilgan tadbirda viloyat hokimi E.Turdimov ishtirok etdi.

Sportga qaratilayotgan e'tibor natijasida aholining ommaviy sportga qamrovi oshayotgani, sportchilarning Osiyo va jahon chempionatlarida yurtimiz sha'nini munosib himoya qilayotgani va ushbu spartakiada ham davlat xizmatchilari o'rtasida sog'lom turmush tarzini targ'ib etishga xizmat qilishini ta'kidlab, barcha ishtirokchilarga omad tiladi.

Musobaqalar 20-fevralga qadar davom etadi.

Saxovat – benazir qadriyat

"Adolat" sotsial demokratik partiyasining shu nomli loyihasi asosida partiya viloyat kengashi tomonidan deputatlar va faollar jalb etilgan holda nogironligi bo'lgan shaxslar, bemorlar va yolg'iz keksalar holidan xabar olinmoqda.

Jumladan, partiya viloyat kengashi rahbarlari va deputatlar Past Darg'om tumani Po'latchi mahallasida yashovchi, 1984-yilda tug'ilgan Sevara Shermatova holidan xabar oldi. Bolaligidan nogiron bo'lgan Sevaraning yashash sharoiti, ehtiyojlari o'rganilib, unga zarur tibbiy-ijtimoiy yordam ko'rsatish belgilandi.

Ishtixon tumani Murodobod mahallasidagi I guruh nogironlari Tohir Norbekov hamda Zamira Norbekova bilan suhbat jarayonida ular davolanish va sihatgohda dam olish uchun partiya rahbarlaridan ko'mak so'radi. Bu masala ham tegishli idoralar bilan kelishilgan holda ijobiy hal etildi.

- Farzandlarim xastaligi tufayli har uch oyda davol-

lanib turadi, - deydi Samarqand tumani Shalg'amon mahallasida yashovchi Shoir Mansurova. - Lekin hamma vaqt ham bunga imkon bo'lmaydi. Xonadonimizga yo'qlab kelgan "Adolat" partiyasi rahbarlari va deputatimizga shu haqda aytgandim, ular yordam berishlarini aytishdi. Baraka topishin ilohim!

"Saxovat – benazir qadriyat" loyihasi partiyamizning mavsumiy yoki biror sanaga bag'ishlangan tadbiri emas, doimiy ravishda amalga oshiriladi, - deydi "Adolat" SDP viloyat kengashi raisi o'rinbosari Lola Sayidova. - Bunda mahalliy kengashlar va parlamentdagi deputatlarimiz ham faol ishtirok etishadi. Nogironligi bo'lgan, ehtiyojmand yurtdoshlarimizga partiyamiz tomonidan, shuningdek, homiylar jalb qilingan holda imkon qadar yordam ko'rsatiladi. Oziq-ovqat mahsulotlari, dori-darmon, kitoblar beryapmiz. Fuqarolarning murojaatlari asosida tegishli tashkilotlar bilan hamkorlikda muammolar hal etilmoqda. Bu sa'y-harakatlar partiyamiz dasturiy maqsadlarida ham o'z ifodasini topgan, qolaversa, bu har birimizning insoniy burchimiz hisoblanadi.

O'z muxbirimiz.

REKLAMA, E'OLONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tekzor, samarali va hamyonbop / MUHOJAAT UCHUN TELEFON: 66-233-91-56

MINNATDORMAN!

Inson hayoti, salomatligi hamma narsadan aziz. O'z kasbining fidoyi insonlari bor ekan, xalqimiz sog'-salomatdir. Pensiyaadaman, yoshim yetmish beshda. Yaqinda oyog'im bezovta qila boshladi. Kattaqo'rg'on shahar tibbiyot birlashmasiga bordim. Meni yaxshi davolashdi, ahvolim yaxshilandi.

Bu dariddan forig' bo'lishimda mendan o'z maslahati va amaliy yordamini ayamagan bosh shifokor Davron Nazarov, katta hamshira Shahnoza Qo'chqorova, hamshira Ilmira Xudoyqulova, navbatchi hamshira Lola Hamidova hamda barcha xodimlardan minnatdorman.

Sizlarga mustahkam sog'lik, mashaqqatli ammo sharafli kasbingizga to'layman. Ilohim qo'lingiz dard ko'rmasin!

Muhabbat HIKMATOVA,
Kattaqo'rg'on shahri.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Jo'rayev Kamoliddin Muhiddinovich notarial idorasida marhum Baratov Ismoilga (2022-yil 28-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Kamoliddin Muhiddinovich notarial idorasiga murojaat etishlarini so'raymiz.

Manzil: Samarqand shahri O'zbekiston ko'chasi, 35-uy.

Samarqand tumani xususiy amaliyot bilan shug'ullanuvchi notarius Davronov Mahmud Hasan o'g'li notarial idorasida marhum Zayniyev Gulshan

Tadjiyevichga (2018-yil 8-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Davronov Mahmud Hasan o'g'li notarial idorasiga murojaat etishlarini so'raymiz.

Manzil: Samarqand tumani Oqmachit mahallasi, Bag'rikenglik ko'chasi, 4-uy.

BEKOR QILINADI

Abyazova Elmira Iskanderovna nomidan ishonchnoma asosida Mamedov Emil Salimovich va Abdug'aniyev Aloudin Abdullaxolq o'g'li o'rtasida Samarqand shahri "Chorbog'" MFY, Zavodskaya ko'chasi 1-"A" uy, 8-sonli kvartira uchun tuzilgan, Samarqand shahrida

xususiy amaliyot bilan shug'ullanuvchi notarius Aliyeva Lola Zoirovna notarial idorasidan 2020-yil 18-martda tasdiqlanib, Ksh 030768 SA blankada tuzilgan, 20200684001195 raqam bilan reestrga kiritilgan oldi-sotdi shartnomasining asl nusxasi yo'qolganligi sababli bekor qilinadi.

Samarqand tumaniidagi "MAX PRO BUXGALTER" mas'uliyati cheklangan jamiyatining (STIR: 309551899) dumaloq muhri yo'qolganligi sababli bekor qilinadi.

TOPGANGA MUKOFOT!

Samarqand viloyat prokuraturasidan Usmanov Farrux Azimjon o'g'li nomiga

berilgan Ishtixon tumani prokurori ekanligini tasdiqlovchi PR 01624-raqamli xizmat guvohnomasi Samarqand viloyati hududida yo'qolgan. Ushbu hujjatni topganlardan mukofot evaziga qaytarishlarini so'raymiz.

Telefon: +99893-333-63-33.

Samarqand viloyat prokuraturasidan Abdumutalov Olimjon Abduraxmonovich nomiga berilgan Past Darg'om tumani prokurorining o'rinbosari ekanligini tasdiqlovchi PR 01566-raqamli xizmat guvohnomasi Samarqand viloyati hududida yo'qolgan. Ushbu hujjatni topganlardan mukofot evaziga qaytarishlarini so'raymiz.

Telefon: +99893-333-63-33.

IKKI QADAM OLDINDA!

Bu – tilimizda qo'llaniladigan shunchaki bir gap, balki o'n qadam deyilar. Muhimi, kimningdir boshqalardan ilg'or fikrlashi, uzoqni ko'ra bilishiga ishora qilib, e'tirof etib, aytilgan gap.

Toshpo'lat aka haqida yozishga chog'langanimda, xayolimga kelgan ilk fikr shu bo'ldi.

Bu inson boshqalardan o'zga-chi fikrlashi, ko'nglidagini qog'ozga tushira olishi yoki aytib bilishi bilan ajralib turadi. Balki shuning uchun ham o'tgan asr to'qsoninchi yillarida Samarqand shahar hokimligi rahbarlari u kishiga garchi tarixchi bo'lsa-da, shahar gazetasi muharrirligini ishonib topshirgandir. O'sha paytda ham Toshpo'lat aka matbuotdagi o'tkir maqolalari, televideniyaedagi dadil chiqishlari bilan ko'zga tashlanib turgan.

Respublikamiz endigina mustaqillikka erishib, barcha soha va tizimlar yangidan tashkil etilayotgan paytda Toshpo'lat aka shahar gazetasini yangicha ruhda chiqardi. Xorij matbuoti tajribasini o'rgandi, turli xalqaro tashkilotlar bilan hamkorlik qildi. Shuning uchun hali katta-katta ijodiy uyushmalar, tashkilotlar harakat boshlamagan paytda respublikamizda birinchilardan bo'lib xalqaro tashkilot grantini qo'lga kiritdi, ular bilan hamkorlik qildi, elchixonalar bilan aloqalarni yo'lga qo'ydi. Tahririyat qoshida jurnalistlar uchun mahorat maktabi tashkil etilishi, internet jurnalistika o'rgatilishi ham o'sha davr uchun yangi, tasavvur qilish qiyin bo'lgan gap edi.

Toshpo'lat aka internetda yoza boshlagan, bu tizim imkoniyatidan samarali foydalanayotgan paytda blog, blogger degan tushunchalar hali hayotimizga kirib kelmagan, bu so'zlarga tilimiz ham kelishmasdi. Lekin o'shanda bu insonning fikrlarini ko'pchilik to'g'ri qabul qilmagan, uni tushunmagan. Haqiqatni aytish kerak, tanqid zarur, deyilsa-da, buni qabul qilish hech qachon oson kechmagan. Toshpo'lat aka esa to'g'risini aytishni, haqiqatga tik boqishni yaxshi ko'radi. Hozir ayrimlar ijtimoiy tarmoqlardagi uch-to'rtta chiqishini dastak qilib, o'zini go'yoki adolatparvar blogger sanaydi. Ammo ko'pchiligining yozayotgan fikri, aytayotgan gap ortida shaxsiy manfaat, tama yaqqol ko'rinib turadi.

Ustozlarimiz biror bir masalani ko'tarib chiqingimi, oxirigacha bor, bir marta yozib, tashlab qo'yma, toki undan odamlarga naf tegsin, deyishadi. Toshpo'lat aka ankaning yozayotganlari, yon-atrofdagi illatlarni yoritishi ham aynan shu mezoniga asoslangan. U



kishi ijtimoiy tarmoqlardagi sahifalari-da yoki ommaviy axborot vositalarida umummanfaati bilan bog'liq biror mavzu haqida yozdimi, o'sha muammo hal bo'lmaguncha, mas'ullarga yetib bormaguncha qayta-qayta yoza veradi. Tanqidiy material yozgan jurnalistda shu mavzuda yana bitta fakt bo'lishi lozim, degan qoidaga amal qiladi va keyingi gal masalaning yana bir nozik tomonini ko'rsatib beradi.

Bugun davlat hokimiyati organlari, tashkilotlar mas'ullari ishtirokida matbuot anjumanlari, brifing, press-tur o'tkazish an'anaga aylandi. Bu masalada ham Toshpo'lat aka ko'p yillar oldin bir necha marta chiqishlar qilgan, rahbarlarni shunga da'vat etgandi. Ayni chog'ga esa ustoz bu tadbirlarda faol qatnashish barobarida, masala mohiyatini ochib berish, rahbarlarga qanday murojaat qilishda yoshlarga ibrat bo'lmoqda.

Toshpo'lat aka bundan besh yil avval, 70 yoshga to'lganda ayrim hamkasblarimiz "endi pensiyani olib, mazza qilib yursangiz bo'ladi", deyishgandi. Ammo mahalladoshlari – bog'imaydonliklar boshqacha fikrda ekan, Toshpo'lat aka mahalla raisi etib saylashdi. Shunda ham ko'pchilik turlicha fikr bildirdi – birov endi yozmaydi, desa boshqalar mahalla ishi og'ir, bu ishni eplay olarmikan, dedi. Lekin Toshpo'lat aka yozishni ham to'xtatmadi, mahalla ishini ham tashlab qo'yamdi, aksincha, mahallalar hayoti bilan bog'liq ko'plab masalalarni matbuotga olib chiqdi, muammolar to'g'risida jar soldi. Bu orqali nafaqat Bog'imaydon, balki o'zini o'zi boshqarish tizimi bilan bog'liq ko'p muammolar hal etildi.

Yonimizdagi odamlar

Mahalla fuqarolar yig'inlari "beshlik" tizimi asosida ishlay boshlagach, ak-sariyat raislarining to'rtta turli soha vakili boshini biriktirib ishlashi qiyin kechdi. Lekin Toshpo'lat aka hokim yordamchisi yoki yoshlar yetakchisi bo'ladimi, profilaktika inspektori yoki xotin-qizlar faolimi, kerak bo'lsa, ularning viloyat boshqarmasi rahbarlariga chiqib, har kimning o'z o'rnida, zimmasidagi vazifasini bajarishini ta'minlay oldi. Endilikda mahallada "yettilik" yo'lga qo'yilmoqda va yaqinda bu haqda ijtimoiy tarmoqdagi sahifasida "Mahalla xodimlari o'z ish joyida bo'lmog'i lozim. Yig'ilishda emas!" degan sarlavha ostida o'z fikrlarini bildirdi:

Mahalla "yettiligi" tizimini tashkil etishdan maqsad aholining asosiy muammolari mahallaning o'zida hal bo'lishiga erishishdan iborat. Odamlar ovorayu sarson bo'lib, idorama-idora yurmasdan, mahalla raisiga yoki mahallaning boshqa xodimiga murojaat qiladi. Ular tegishli davlat organiga muammoni yetkazadi. Davlat organi vakili muammoni hal etadi, zarur bo'lsa, mahallaga keladi.

Aslida shunday bo'lishi kerak. Amalda-chi? Haligacha boshqaruv idoralari tizimi ushbu yangicha ish-lash mexanizmini hazm eta olmayap-ti. Bu yo'nalishdagi qonun hamda davlat rahbarining farmon va qaror-lari to'lasincha ijro etilmoqda deb bo'lmaydi".

Toshpo'lat aka raisligida Bog'imay-donda qanday muammolar hal etil-gani, aholi boshi biriktirilib, amalga oshirilayotgan xayrli ishlar to'g'risida batafsil to'xtalmoqchi emasmiz. Buni ko'pchilik ko'rib turibdi, boshqalar bu tajribalarni o'rganyapti. Faqat bir ibratli tadbirni eslamochimiz. O'tgan yil mahalla markazida "Qo'sha qarigan baxtli oilalar – mahallamiz iftixori" deb nomlangan ma'rifiy tadbir uyushtirildi. Unda 50-65 yil birga yashagan 10 ta oilaning "oltin to'yi" o'tkazilib, qo'sha qarigan nuroniyning hayot yo'li, turmush tarzi yoshlarga ibrat qilib ko'rsatildi. Tashabbusni viloyat va shahar hokimliklari, ko'plab tashkilot-lar qo'llab-quvvatladi, mas'ullar borib, baxtli oilalar egalarini tabriklashdi.

– Bu bilan "oltin to'y"ni targ'ib qilmayapmiz. Ayrim yoshlar, hatto ota-onalar ham oilaga yuzaki qarayot-gani, ajrimlar ko'payib borayotgan bir paytda oilaning muqaddasligi, er-xo-tinning ahiligi baxtli hayot asosi ekan-ligini tushuntirmochimiz, – degandi o'shanda Toshpo'lat aka.

Ha, aytganicha, Toshpo'lat aka-ning o'zi ham ana shunday baxtli oila sohibi. Sofiya aya bilan 53 yildan buyon turmush kechirib, uch farzand-ni kamolga yetkazishdi. Hozirda ular o'ndan ortiq nevara va evralarning bobo va buvisi.

Ustoz jurnalist Toshpo'lat Rah-matullayev bugun 75 yoshga to'ldi. U kishini qulug' yosh bilan tabriklab, mustahkam sog'lik tilaymiz.

G'olib MATLABOV.



"Kitob do'koniga "Lolazor" kelganmish!" Ana bo'larkan-u: oyog'imni qo'limga olib kitob do'koniga chopdim. Afsus, tugab qolibdi. Necha yildan beri izlaganim, bir zamonlar talabalikda o'qiganim, kitob javonimning eng tepasida turishini istaganim – "Lolazor" yana nasib qilmadi.

– Nahot, tugadi?.. Balki bitta-yarim qolganidir, – dedim umid bilan. Sotuvchi qiz mening holatimga hayron bo'ldi va dedi:

– Yana "zakaz" qilganmiz, keladi.

– Kelsa-yu, yana shu ahvol bo'lsa-chi?! Kech qolsam-chi?! – xavotirimni aytishdan tortin-madim.

– Siz uchun bitta olib qo'ya-man, xabar olib turing! – dedi qiz.

Naqd ikki oycha xabar olib tur-dim. Har o'tganimga so'ray-man. Keyingi borishlarimda so'ramasam ham "Lolazor" kelmadi", deydingan bo'lishdi. Ishqilib kitob do'konini xodimlari menga "Lolazor" degan laqab qo'yishmasin-da. Balki orqa-vo'ratdan shunday deiyshayot-gandir, deb o'yladim.

Yana bir e'tiborli jihatga to'xtalmasam bo'lmaydi. Har gal kitob do'koniga kirganimga quruq chiqmadim. Bir-ikki kitob olaman. Kitob javonim ham to'lishib, chiroyli ko'rinishga kelib qoldi.

Kecha do'konga kir-sam, ne ko'z bilan ko'rayki, "Lolazor"ning besh-oltitisi turibdi. Ko'zlarimga ishonma-dim. Shartta ikkitasini bag'rim-ga bosdimu pulini to'lashga oshiqdim.

– Voy, siz ham "Lolazor"ni juft oldingizmi? – dedi sotuvchi qiz.

– Ha, bu yomonmi? – de-dim? – Uchtadan olish kerak-mid?

– Yo'q, siz to'g'ri tushuning. Bu kitob o'tgan kuni kelgan

edi. Kim kelsa, "Lolazor"dan ikkitedan olib ketayapti. Do'konimiz ochilganidan beri hech qaysi kitob bu darajada sotilmagan edi, – izohladi u shosha-pisha.

– Juda ajoyib-ku. Men aniq ishonaman. Bu kitob shunga munosib, – dedim unga. Ishxonamga keldimu, uzoq kutgan kitobimni o'qishga sho'ng'ib ketdim...

Shu o'rinda kitob haqida sizga yolg'on, menga chin, bir voqeani aytib beraman: talaba-ligimda bir hamxona kurs-doshimiz "Lolazor"ni boshiga yostiq qilib yotardi. Tavba, das-turxon boshidayam shu kitob. Ba'sh qolsa, "Lolazor, lolazor" degan qo'shiq aytadi. "Hoy inson, buncha yopishib olding, ber qani, biz ham mundaq o'qiylik" desam, ushlab ko'rish-ga-da qo'ymaydi, juda g'alati.

Qiziqishim oshib u uxlagan-da, biror joyga chiqqanda, besh-o'n varag'ini o'qiyman. Qaydandir keladi-yu, tortib olib qo'yadi. "Zarur bo'lsa, topib o'qi, lekin bunga qo'l tekkiz-ma!". Bilishimcha, shu yigit-cha "Lolazor"ning anchagina qismini yodlab ham olgan edi. Ba'zida undan monolog ham o'qib qolardi.

Xullas, bo'lmadi, viloyat kutubxonasiga borib, tanish opalarga yalina-yalina o'qilaverganidan titilib ketgan "Lolazor"ni olib kelib o'qidim. Tugatmaguncha darsga bor-masdan o'qiyverdim-o'qiy-verdim. Ba'zi sahifalarini qay-ta-qayta o'qidim.

Keyin haligi kursdoshimga:

"Endi ikkovimiz tengmiz" ded-im. U mudom bizni maskara qilardiki, "senlar ham yurib-sanlar, "Lolazor"ni o'qimay!". Biz mulzam bo'lardik o'sha paytda.

Sevimli yozuvchimiz Murod Muhammad Do'stga chandon havas qildim. Shu kitobni deb yoqalashishgacha borganlar-ni-da ko'rdim. Yozuvchiga bundan ortiq ne kerak, birodar-lar! "Shunday asar yozsangki, kitobxon uni o'qiyotganida hamma narsani unutsa, asar qahramonlari hayoti bilan yashasa. Kitobni o'qib bo'lgan kuni kechasi bilan uxlamay, to'lg'onib chiqsa... Vaqti kelib o'sha kitobni yana qo'lga olganida, qaytadan hayajonga tushsa... Orzum shu...". – deb yozgan edi adib O'tkir Hoshi-mov. Neajabki, bu baxt Murod Muhammad Do'stga ming bora nasib etdi, desam yanglishma-gan bo'laman.

Kezi kelganda aytish lozim, mutolaa qilish baxtiga bizni ozmi-ko'pmi musharraf etgan behad zahmatkash va mehnat-kash do'stimiz Davronbek Tojialiyeva o'z minnatdorligim-ni bildiraman. Azbaroyi kitobga muhabbati uchun juda qattiq xurmat qilaman. Bu yigitning sa'y-harakati bilan ko'plab topish mushkul bo'lgan nodir kitoblar elektron ko'rinishda "ziyo.uz" saytidan joy oldi. Hat-to "Lolazor" ham.

Ammo biz kabi kitobni suvganlarga elektron tarzda o'qish ancha mushkul savdo. Uch-to'rt sahifani o'qiguncha "dod" deyishgacha borasan, kishi. Lekin elektron shakli-ni kitoblar elektron ko'rinishda "ziyo.uz" saytidan joy oldi. Hat-to "Lolazor" ham.

Uzr, ko'p gapirib yubordim, vaqtim kamroq edi, "Lolazor"ni o'qiyotgan edim...

Do'stбек SULAYMONOV.

Tavba! Miyasi suyulganlar muallim bo'ladi, deb eshitgandim, haqiqatan rostga o'xshaydi. Ana ma-zatra-yu, ana tuzu tuturiq. Nima emish, o'g'limga beparvo emishman?! Voy pismig'ey, o'rgildim sen-dek ichkuyardan. Bolasiga mendek e'tibor beradi-gan ota yetti iqlimda ham topilmasa kerak. Yegani oldida, yemagani ketida. Qo'g'irchoqdek kiyintirib qo'yibman. Mana, yaqinda sen umringda ko'rmagan importniy po'stin olib berdim. Poyabzalini-ku, yilda to'rt marta almashtirib beraman. O'zingni bil, o'zingni. O'g'ling besh yildan buyon bitta eski paltoni sudray-di. Yana sen gapir-a, sen gapir. Voy mishi-ey, voy ichi qora-ey. Ko'rolmaydi-da, ko'rolmaydi. Yana nima deydi deng-a? Farzandimning kelajagi meni qiziqtir-mas emish. Ol-a, meni qiziqtirmani seni qiziqtiradimi, pismiq? Men o'g'limning kelajagini allaqachon o'ylab qo'yibman, nodon. Yuridicheskiydagi domla oshnam bilan hammasini kelishib qo'yganman. Sen shoxida yursang, men bargida yuraman, pismiq. Hovli-joy-chi, imorat-chi? Sandiqlarni-ku, to'ldirib qo'yibman. Axir, ular kim uchun, o'g'lim uchun-da, nodon. Mashinani ham o'g'limga deb niyat qilib olib qo'yibman, hali kattaroq bo'lsin, ko'rasan, ko'zingni o'ynatib, yoning-dan bibillatib o'tib ketishini. Mana, sen qirq yildan beri maktabning tuprog'ini yalaysan, birorta eshak olib minoldingmi, pismiq? Bola kelajagini o'ylash bundan ham ortiq bo'ladimi, axir...?

O'g'lim, bu yoqqa keling-chi, tanobingizni tortsam,

PISMIQ

tortib qo'yay. O'sha pismiq muallimlarining ko'ng-li joyiga tushsa tushsin. Qo'lingizdagi nima? Kitob? Qanaqa kitob? "Iqtisodiy bilim asoslari"mi? Iye, shunaqa kitob ham bo'larkanmi? Biz o'qimagan edik-ku! Hmm, oltinchida o'qitmaydimi? Ha, endi olti sinfni bitirgani-mizni yuzimizga solmang-da, ota o'g'li. O'qimagan bo'lsak ham uqqanmiz, nima bo'lganda ham tadbirkor degan nomimiz bor. Siz ham bunaqa betayin kitoblarni ko'p o'qib, vaqtigizni bekorga o'tkazmang. Hisobga zo'r bering, hisobga. Hamma narsaning onasi hisob, o'g'lim. Muallimlar vazifa bergan deysizmi, xo'sh, nima deb yozgan ekan o'sha kitobingizda, qaysi varag'ini o'qiyapsiz? Nima? "Pul" mavzusini deysizmi? Yo'g'e-u, shunaqa mavzuniyam o'rgatadimi? Men ularning mi-yasi suyulgan deb yursam, ilmi zo'rga o'xshaydi-ku. Xo'sh, xo'sh nima degan ekan pul haqida?

Hmm, to'g'ri, to'g'ri. Albatta-da, o'g'lim, hamma narsani pulga sotib olish mumkin. Ey, juda to'g'ri, eng zo'ri oltin, ha-da, qiymati yo'qolmaydi deganmi? Otasiga rahmat shu kitobni yozgan odamning. Mak-

tabda ham bama'ni narsalarni o'rgatar ekan-ku, ota o'g'li. Hamma ayb o'zingizda, o'qish kerak, o'qish. Xo'sh, muhtaram muallimlaringiz yana qanaqa vazifa bergan sizga, bir taftish qilaylik-chi. Shu gazetalarini ham o'qishingiz kerak ekanmi? Gazetalarda yolg'on-ni ko'p yozadi-da, ota o'g'li. Undan nimani topibdi muallimlar? Obod mahalla yili deysizmi? Albatta-da, mahallani obod qilish kerak. Mana biz ham mahallani obod qilib yotibmiz. Dang'illama imorat qurdik, endi dala hovliniyam dang'illatib quramiz, mahalla obod bo'ladi qo'yadi. Xo'sh, yana nima gaplar bor? Xusu-siyashtirish deysizmi? Buyam yaxshi gap. Mana, magazinlarni xususiyashtirgandik, xo'p, endi ombor-larni ham xususiyashtirgandik, ish bitadi qo'yadi. Tavba, gazetada ham durust gaplar chiqar ekan-ku. O'qimas ekanmiz-da, attang. Xo'sh yana nima deyishibdi, ota o'g'li? Nima?! Soliqlarni o'z vaqtida to'lash - farovonlik garovi deyishibdi, deysizmi? Bu nima degani? Iye, bu qanaqasi bo'ldi-a, shuncha bama'ni gaplardan keyin soliqqa balo bormi? E, bo'ldi-bo'ldi, o'g'lim, u yog'ini o'qimang, suyulasiz. Boring, undan ko'ra do'konni oching, men ham hozir yetib boraman. Maktabga bo-raman deysizmi, boring, boring, buyurgan ishni qiling. Ayt-dim-a, bu pismiq muallimlarning tayini yo'q deb...

Xudoyberdi KOMILOV.

Hajviya

Mushtariy ilhomi



Bugun gul ham bog'da ma'yus ko'rinar,
Miskinlik ko'raman yaproqlarida,
Netay, orzularim kulga aylandi,
Ishqning iztirobu qiynoqlarida.
Suvsiz quridimi olgan gullarim,
Savollar ichida holsiz qolaman.
Mustar gullar kabi tuyg'ularimni,
O'tdan olib, yana o'tga solaman.
Topolmadimi yoki men kabi dardkash,
Hajron azoblarini olib kifitga,
Sabr topmadimi va yoki yakkash,
Iztirobdan kelgan dardning taftiga?
Gulning bargidagi tomchi shabnamdek,
Qalbinga tomchilar kelar quyilib.
Men gulga o'xshayman, gul esa menga,
Shu holga tushganmiz sevib, sevilib...

**Narzitosh YUSUPOVA,
Samarqand shahri.**



MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 12 695 nusxada chop etildi. Buyurtma 94. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.
Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da.
Bosishga topshirildi: soat 19:00

Navbatchi muharrir:

A.SHERXOLOV.

Navbatchi:

F.RO'ZIBOYEV.

Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



Sotuvda narxi kelishilgan holda